

यशाया जरियल परमेश्वरक बचन

इसायलक नक रॉज आहाबक बाद इसायल और यहूदा मिं भौत दुसार-दुसार रॉज हई, जो परमेश्वर कै नि मानिबेर दुसार देवि-दयाप्तोक पुज करछी।

परमेश्वरल उनुकै चेतावनी दिणक लिजी आपण भौत सेवकों कै उनर पास भेजौ, कि उं पश्चाताप करिबेर उनर नीमोक पालन करो। उनुमिंबे यशायाह नामक एक मैस छी, जो लगभग एलीशाक एक सौ साल बाद आ। वील आपण बखतोक रॉजों कै खबरदार करौ कि उं परमेश्वरक तरफ लौट आओ। उनुकै दुसार दयाप्तोक पुज नि करण चैन, और गरीब और दीन-दुखियोंक दगाड़ दया और प्रेम दिखैबेर उनेरि मधत लै करो। और अगर तुम यस नि करला तब तुमुकै परमेश्वर पक्क सजा दयाल।

परमेश्वर आपण मैसों कै चेतावनी दिनीं

(यशाया ?)

आमोसक चयल यशायाहल यौ दर्शन यहूदा प्रदेश और यरुशलेम नगरक बारि मिं देखीं। वील यौ यहूदा प्रदेशाक रॉज उजियाह, योताम, आहाज और हिजिकियाक बखतों मिं देखछी।

ओ अगाश सुण, ओ धरति मेरि बात मिं ध्यान दे,

किलैकि यौ प्रभुल कै रॉखी कि मील शैत-पाइबेर नॉनतिनों कै ठुल बणा,

पर उनुल म्यर खिलाफ अवाज उठै दे।

बल्द आपण गुसै कै पछ्याणुं और गधा आपण गोठ कै जाणुं,

लेकिन इसायली मिंकै नि पछ्याणन,

और म्यार मैसों कै यौ समझ लै न्है।

ओ पापि देश और पापक बोझल दबी मैसो,
 तुमुल इस्रायलक पवित्र-परमेश्वर कै तुच्छ समझौ,
 ओ कुकरमियोंक सन्तानो, ओ बिगणी च्यालो, तुमुल प्रभु कै छोड़ि है
 और उनुधैं आपण मूख लौटैबेर भौत दूर न्हैं गेछा!
 तुम कब तलक बगावत करनै
 और कब तलक मार खानै रौला?
 तुमर पुर ख्वर घैल छु और तुमुकै के ताकत न्है।
 खुटों बे ख्वर तलक तुमर बस चोटै-चोट छु,
 और डोर, दामाड, और घौ-घौक अलावा और के न्हैं।
 उनर पीप लै नि निकालि रॉख,
 और न उनुकै साफ करिबेर तेल लगा।
 तुमर देश उजड़ गो,
 और तुमार नगर ऑगल भसम है गई।
 और तुमर आंखोंक सामण बिदेशी मैस तुमार गॉड़-भिड़ों और
 नगरों कै लुटनी।
 यरुशलेम नगरक हालत एक छ्वेडी छानक चारि है रैछी,
 और उ सेनाल घेरी नगरक चारि निराश छु।
 अगर सर्व-शक्तिमान प्रभुल हमु मिबे थ्वाड़ मैसों कै बचाई नि हुछियौ,
 तब हमर नाम-निशाण लै सदोम और गमोरा नगरोंक चारि मिट
 जांछी।
 ओ इस्रायली प्रधानो, तुम जो सदोमाक चारि बदमाश छा,
 प्रभुक यौ बात सुणो,
 और गमोरा नगरक चारि कुकरमी मैसो,
 हमार परमेश्वरक नीमों मि ध्यान दियो।
 प्रभु यस कूनी, "म्यर लिजी तुमेरि बली के कामकि?
 मी यौ पालतू जानवरोंक और भड़ोंक बलिल बिछी गोयूं।
 मी बल्दों और भेड-बॉकरोक बलिदान चढणल खुशि नि हुन।
 तुम आपण यौ बे-मतलबकि भेट-बलिदान म्यर लिजी नि ल्याओ,
 और तुमेरि धूपकि खुशबूल मि कै नफरत है गे।
 इदुकै न मि कै तुमार सब त्यारों बे लै नफरत छु।
 प्रार्थना करण बखत जब तुम आपण हात म्यर तरफ ताणला,
 तब तुमर तरफ बे मी आपण मूख लौटै ल्यूल।

और तुम कदुकै प्रार्थना किलै नि करनै रओ, मी नि सुणूं
 किलैकि तुमार हात खूनल रंगी छन।
 तुम आपुं कै धोओ और आपण मनो कै साफ करो,
 म्यर सामण बे आपण गलत कामों कै दूर करो।
 तुम बुराइ करण छोड़ि दियो,
 भलाई करण सिखो और न्यायी बणो
 अन्यायी कै रोको, अनाथ कै न्याय दिलाओ,
 और विधवाओंक दगाड़ लै यस्सै करो।"

प्रभु यस कूनी,
 "आओ, आँब हम आपण सब बातों कै निपटै लिनू।
 चाहे तुमार पाप कदुकै लाल किलै नि हो,
 उं लै सफेद पट्ट है जॉल।
 अगर तुम हुकुम मानणक लिजी तैय्यार छा,
 तब तुमार भकॉर हमेशा भरी रौल।
 लेकिन अगर तुम म्यर हुकुम नि मानिबेर झगड़ करला,
 तब तुम तलवारल मॉर दी जॉला।"
 यौ बचन प्रभुल आपण मुखल कै रॉखी।
 पैली यरुशलेम एक येसि नगरी छी,
 जो मिं पर भरौस करछी और म्यर हुकुम मानछी।
 पर आँब उ एक धंध करणी स्यैणिक चारि बणि गे।
 पैली वीक निवासी न्याय पसंद छी,
 पर उं आँब अन्यायी बणि गईं।
 ओ यरुशलेम, तेरि चांदि मैली गे,
 और तुमर अंगूरक रस लै फिक है गो।
 तुमार सैप झगडु और चोरोंक दगडु छन।
 और भेट लिणक लिजी दौड़नी।
 उं अनाथोंक मधत नि करन,
 और विधवावोंकि बात लै नि सुणन।
 आंखिरकार इस्रायलक सर्व-शक्तिमान परमेश्वर यस कूनी,
 "मी आपण रीश दुश्मणों मिं उतारिबेर
 उनर दगाड़ पक्क बदाव ल्यूल।

मी तुमुमिं लै आपण हात उठूल
 और छारूणल रगड़बेर त्यर मनक सॉर मैल कै भसम करि द्यूंल ।
 मी त्यार न्यायों और मन्त्रियों कै पैलियक चारि आजि ठैरूल
 और तब तु धारमिक नगर कहलाली,
 और मैस त्यर भरौस करॉल ।
 यरुशलेमक मुक्ति न्यायल,
 और मन फिरुणियोंक बचाव धारमिकताल ह्वल ।
 लेकिन पापि और बदमाशोंक नाश करी जॉल,
 और प्रभु बे दूर जाणियोंकि पुर बर्बादी है जालि ।
 तुम खुशि-खुशील बांजक बोटोंक पुज करछिया,
 पर इनरै कारण तुमुकै शरम लागेलि ।
 किलैकि तुम उ बांजक बोटोंक चारि है जॉला,
 जैक पात पिडई गई ।
 और तुम उ बगीचक चारि सुक जॉला,
 जकै पाणि नि मिलन ।
 ताकतबर मैस सणक एक धॉग,
 और वीक सब खराब काम, एक चिणककि चारि छु ।
 आंखिरकार उं द्विवै एक दगाड़ जल जॉल
 और उ बखत उनुकै बचूणी क्वे नि हो ।

परमेश्वर सब मैसोंक न्याय करॉल

(यशाया २)

यशायाहल यहूदा प्रदेश और यरुशलेमक आपण दर्शन मिं यौ सुणौ,
 उणिवाँल बखत मिं यस ह्वल
 कि जो डॉन मिं परमेश्वरक भवन बणी छु,
 उ डॉन दुनियाक सब डॉनों मिं सबुहै खाश ठैराई जॉल,
 यौ कारणल दुनियाक सब देशोंक और जातियोंक मैस वां जॉल ।
 और यस कौल, "आओ, हम प्रभु-परमेश्वरक डॉन मिं जानू,
 हम याकूबक परमेश्वरक भवनक तरफ हिटनू,
 जैल प्रभु हमुकै आपण बाँट सिखाँल
 और हम उमिं हिट सकुल,
 किलैकि वां प्रभुक बचन परकट हवाल ।"

उं जाति-जातियोंक न्याय करॉल,
 और देश-देशोंक मैसों कै आपण फैसॉल सुणाल।
 जैल सॉर दुनी मिं शानति ह्वेलि,
 और देश-देशोंक मैस आपण तलवारों हवक फाव
 और भॉलोल दाथुल बणाल।
 यैक बाद एक देश कभै दुसर देश मिं हम्मल नि करो
 और न फिर लड़ैक शिक्षा ल्याल।
 हे याकूबक बंशजो, आओ,
 हम सब प्रभुक उज्याव मिं हिटनू!
 हे प्रभु, तुमुल आपण छांटी याकूबाक बंशजों कै छोड़ि है,
 किलैकि उं दुसार देशोंक जाँद-टुन करणियोंक चारि बणि गईं
 और इनर अलावा उं अन्य जातियोंक दगाड़ मेल-जोल लै बढूनी।
 उनर देश सुन और चांदिल भरी गो,
 वीक के गिन्ति न्हैं।
 उनर देश मिं घवाड़ोंक कमी लै न्हैं।
 और उनर पास भौतै रथ लै छन।
 उनर देश भौतै मूरतियोंल भरी छु,
 जनुकै उनुल आपण हातोंल बणै रॉखौ,
 और उं उनुकै ईश्वर मानिबेर उनेरि पुज करनी।
 लेकिन उं सबों कै निच्च करी जॉल।
 आँब तुम उनुकै माफ नि करिया!
 हे मैसो, प्रभु-परमेश्वरक महान ताकतल डरो,
 और डरिबेर क्वे पखाणक फाँड़ मिं लुक जाओ।
 किलैकि सर्व-शक्तिमान परमेश्वरल हरेक अहंकारी
 और मनबड़ मैसोंक न्याय करणक लिजी एक दिन ठैरै रॉखौ।
 उ दिन घमण्डी मैसों कै निच्च करी जॉल,
 और बस केवल प्रभु-परमेश्वर कै उंच करी जॉल।
 परमेश्वर लैबनोनाँक सब उंच द्यारिक बोटों कै कटॉल,
 और बाशानक ठुल बांजक बोटों कै नाश करॉल।
 हरेक उंच और ठुल पहाड़ों-डॉनों कै उं बारबर करॉल,
 और हरेक उंचि मिनारों कै टोड़ॉल।

ब्यापारियोंक सब पाणिक जहाजों और ठुल नावों कै उं खतम करॉल।
 और मैसोंक सब अहंकार और घमण्ड खतम करॉल।
 तब बस प्रभु-परमेश्वरक नाम ठुल ह्वल
 और उनेरि महिमा ह्वेलि।
 उदिन मैस सुन-चांदिक मूरतियों कै जनेरि उं एल तलक पुज करछी,
 उठैबेर अन्यार मिं खेड़ि द्याल।
 तब प्रभु-परमेश्वर आपण गद्दी बे ठाँड़ उठाँल,
 और मैस उनेरि शक्तिल और डरिल धरति मिं पखाणोंक फाँड़ों,
 और घवानों मिं लुकाँल।
 मैस जो केवल शांस लिबेर ज्यून रुं
 उमिं भरौस नि करो।

परमेश्वरक लिजी यशयाक दर्शन

(यशया ६:१-१३)

जो साल उजियाह रॉज मरौ, उ साल एक दिन मील दर्शन मिं देखौ कि परमेश्वर आपण गद्दी मिं इतुक घेरदार लुकुड़ पैरिबेर भैटराछी कि वील उ पुरि जाँग घेरी रैछी। और उनर चारों तरफ खाश किसमाक स्वर्गदूत छी, जनार छै-छै फांक छी। द्वी फांकोंल उनुल आपण मूख ढक रॉखछी, द्विनोँल आपण खुट और द्विनोँल उं उड़छी। उं आपस मिं जोर-जोरल कूणाछी, “सर्व-शक्तिमान प्रभु पवित्र, पवित्र, पवित्र छु, उनेरि महिमा पुर दुनी मिं भरी छु!” स्वर्गदूतोंकि अवाज इतुक जोरकि छी कि वील उ जाँगकि नींव तलक हिलण लागी। और वां सब जाँग मिं धुड भरी गोय।

उ बखत मील डरिल आपुं धैं कौ, “उइ इजा, आँब मी मरनू, किलैकि मी आपण मुखल पाप करणी एक पापि मैस छूं और पापियोंकै दगाड़ रूनु, पर मील सर्व-शक्तिमान परमेश्वर कै देखौ!” लेकिन एक स्वर्गदूतल ऐबेर वेदी मिंबे आँगक एक क्वैल चिमाटल हात मिं ले और उडैबेर म्यर पास आ। और उकै म्यर ल्युणों मिं छुडैबेर कौ, “देख, मील यैल त्यर ल्युणों कै छुड है, आँब त्यार पाप माफ है गेई, और तु शुद्ध है गोछै।”

यैक बाद मील परमेश्वरकि यौ अवाज सुणी, कि मी मैसों कै बतूणक लिजी ककै भेजुं? मील कौ, “मी हांजिर छूं, मिंके भेजो।”

परमेश्वरल कौ, “तु जैबेर मैसों धैं कौ, कि तुम परमेश्वरक भलि खबर कै सुणला पर नि समझला, तुम आपण आँखोंल देखला पर नि पछ्याणला।

इनेरि मति मारी जाओ, यौं के नि सुडो और न के देखो। इनर मन मिं क्वे बात नि आओ, नतेरि यौं पछ्ताव करन और मी इनुकैं भल करि दिंछी।”

मील पुछौ, “हे प्रभु, हमेरि येसि हालत कब तलक रौलि?” उनुल कौ, “जब तलक गौं और नगर नि उजड़ जाओ। मी प्रभु इनुकैं यौ देश बे निकालिबेर दूर देश मिं लिजूल, जैल यांक जादेतर हिस्स बंजर है जॉल।

अगर यांक दसू भाग लै बचलौ उ लै नाश है जॉल। लेकिन फिर लै, जसिक काँटणक बाद लै बोटक मुन बे फिर एक नानू-नॉन कल्ल निकलनी, उसिकै मिंके मानणिवाँल लै पनपण शुरु ह्वाल।”

शान्तिक रॉज

(यशाया ६:१-७, ११:१-१०)

यशायाहल मैसों कै केवल सजाक बारि मिं न, पर परमेश्वरक करी वैदक बारि मिं लै बता। उनर पापोक कारणल मैसोंक हालत भौत खराब छी, लेकिन परमेश्वरल उनर लिजी एक मुक्तिदाता ठैरा। उ दाउद जस राज करॉल बलकिन वीक हबेर लै भल। यां यशाया उनर जनमक भविष्यबाणी करणौ। जब भौत बखत बाद प्रभु यीशुक जनम हौ, तब यौ सब पुर है।

प्रभु यस कूनी,

जो मैस एल तलक दुःख सहण करणाछी,

उं यौ निराशा बे मुक्त है जॉल।

पैली जबूलून और नफतालियक मैसों कै भौत तुच्छ समझी जांछी,

पर उनर आदर ह्वल।

जो अन्यार मिं भटकणाछी,¹

उनुल एक ठुल उज्याव देखौ।

और जनर लिजी एल तलक रात छी,

उनर लिजी लै आँब रात्ति ह्वेलि।

आंखिरकार उं द्विवै एक दगाड़ जल जॉल

तुमुल उनर हालत सुधारी और उनेरि खुशी बढ़ै।

जस खुशी उं खेति काँटणक त्यारक बखत

उसी खुशी आज उं तुमर सामण मनूणई।

तुमुल उनर गुलामीक जुव और अत्याचारक जांठ कै टोड़ है।

जस तुमुल मिध्यानी सेनाक लड़ैक दिन लै करछी।

¹ जबूलून और नफताली इस्रायलक उत्तर भाग में छी, और दुश्मनोंक हातल नाश करि गई। बाद मिं यौ जाँगक नाम गलील प्रदेश बणौ?, और प्रभु यीशु वां रई और काम करौ।

सिपैनोंक ज्वात जो धब्ब-धब्ब करनै हिटनी
 और उनार खूनल शॉनी लुकुड़ आंगक गाश बणि जॉल।
 किलैक द्यख, हमर लिजी एक भौक जनम है रौ!
 हमुकै एक च्यल दिई गो,
 और उ हमुमिं राज करल।
 वीक यौ नाम धरी जॉल,
 "अद्भुत राय दिणी, ताकतबर ईश्वर,
 हमेशाक बौज्यू, और शान्तिक राजकुमार।"
 वीक राज बढ़नै रौल
 वीक भलाइक कामोंक अंत नि हो।
 उ दाउदक गद्दी मिं भैबेर
 वीक राज कै समावल।
 उ एल बे हमेशाक लिजी
 न्यायक काम करिबेर उकै मजबूत करल,
 आपण भलाइक कामोंल उकै समावल,
 और सर्वशक्तिमान परमेश्वरक जोशल यौ काम पुर करल।
 दाउदक बंश एक काँटी बोटक मुनक चारिं छु,
 लेकिन जस मुन बे एक हांड फुटिबेर फिर फलुं,
 उस्सै वीक बंश मिंबे एक नई रॉज बणल।
 उमिं परमेश्वरक बुद्धि और समझ ह्वेलि,
 उ मैसों कै बाँट दिखूणी और राय दिणी ह्वल,
 वीक पास परमेश्वरक मंशा पुर करणक सार्मथ छु,
 उ परमेश्वर कै जाणिबेर उनर आदर करल।
 प्रभु कै मानण मिं उ खुशि रौल,
 और मैसोंक बात सुणिबेर और उनर मूख देखिबेर
 कै कै न्याय नि करो।
 उ धरमल गरीबोंक न्याय करल,
 और धरतिक सब दीन-दुखियोंक फैसॉल खराइल करल।
 वीक कूणल मैसों कै सजा मिलेलि,
 और उ आपण फुफकारल बदमाशों कै उडै द्याल।

उ आपण मैसों मिं न्यायल और इमानदारिल राज करॉल।
 उनर राज मिं भेड़िया भेड़क दगाड़ रौल,
 और बाघ बकरक पाठक दगाड़ बैठल।
 गोरूक बाँछ और शेरक बच्च दगाड़ै चरॉल,
 और नॉन नॉनतिन उनर ग्वाव है रौल।
 गोरू और भॉल एक दगाड़ चॉर खॉल,
 और उनार बच्च एक दगाड़ पड़ि रौल।
 शेर बल्दक चारि घा खॉल,
 एक नॉनू भौ विषैल स्यापक दगाड़ खेल करल।
 म्यर पुर पवित्र डॉन मिं क्वे न कैकणी दुःख द्याल
 और न कैकणी नुकसान।
 किलैकि प्रभु कै मानणिवॉलोल धरति भरी जालि,
 जसिक समुद्र पाणिल भरी रुं।
 उ दिन दाउदक बंशक उ रॉज देश-देशक मैसोंक लिजी एक उज्याव
 बणल।
 सब देश उनेरि हून-खोज करॉल,
 और उनर रुणी जाँग मिं उज्याव-पट्ट ह्वल।

परमेश्वरक लिजी खुशीक गीत

(यशाया १२)

उदिन तु यस कौलै,
 "प्रभु, मी तुमुकै धन्यवाद दिनू!
 तुम मिंबे रीशै राछिया,
 पर आँब तुमेरि रीश शान्त है गे
 और तुमुल मिक्कै दिलाशा दे।
 द्यखो, प्रभु परमेश्वरै मिक्कै मुक्ति दिणी छन,
 मिक्कै उनुमिं पुर भरौस छु, और मी नि डरन,
 किलैकि परमेश्वर मिक्कै ताकत दिनी,
 और वी मिक्कै मुक्ति दिणी छन।
 मी उनरै बारि मिं गीत गानू।
 तुम खुशि हबेर मुक्ति दिणी छ्वाय बे पाणि प्यला!

तब उ दिन तुम यस कौला,
 "प्रभु कै धन्यवाद दियो और उधैं बिनती करो!
 उनर महान नाम मैसों मिं फैलाओ,
 और सब देशों और जातियों मिं उनर अद्भुत काम बताओ।
 गीत और भजन गै-गैबेर प्रभुक स्तुति करो,
 किलैकि उनुल भौत महान काम करि रॉखीं।
 यौ भलि खबरक परचार दुनियाक सब मैसोंक बीच मिं करो,
 जैल उनुकै यौ सब बातोंक बारि मिं पत्त चल सको।"
 ओ येरुशलेमाँक मैसों, परमेश्वरक लिजी खुशि-खुशी मनाओ,
 किलैकि परमेश्वर महान छन, और उं तुमर दगाड़ रुनी!

मैसोंक लिजी तसल्ली

(यशाया ४०:१-११)

फिर परमेश्वर आपण मैसों कै तसल्ली दिनी कि उनेर सजा हमेशा तलक निरओ। जब मुक्तिदाता आल, उ बखत मैसोंक लिजी भौत खुशीक बखत हवेलि।

तुमर परमेश्वर यस कूनी,
 "म्यार मैसों कै तसल्ली दियो, तसल्ली।
 यरुशलेमाक मैसोंक दगाड़ बात करिबेर उनुकै बताओ,
 कि उनार सजाक दिन पुर है गई।
 उनर पापोंक दाम तौर दिई गो,
 उनुकै प्रभु बे आपण पापोंक पुर सजा मिलि गे।
 सुणो, क्वे धात लगैबेर बतूणौ,
 "हमर परमेश्वरक लिजी रेगिस्तान मिं बाँट सैण बणाओ!
 पहाड़ों कै बुरकाओ, गाड़-गध्यारों कै चिंड़ो,
 उकाँव-हुल्यार सब सैण बणाओ!
 तब प्रभुक महिमा देखियेलि
 यौ सब मैसों कै देखियेलि।
 यौ बात परमेश्वरल आपण मुखल कै रॉखी।"
 मील यौ हुकुम सुणौ, "परचार कर!"
 जब मील पुछौ, "मी के परचार करनू?"
 तब उनुल कौ, "सबनक प्राणि घाक चारि छु,
 उनेरि चमक बगीचक फूलकि चारि जल्दी नाश हुणी छु।

जब परमेश्वरक श्वास घा मिं पडु, तब उ सुक जैं -
 मैंस लै घाक चारि जल्दी नाश है जानी।
 घा सुक और फूल वैलै जानी,
 पर हमर परमेश्वरक बचन कभै नि टलन।"
 ओ यरुशलेम, उंच्च डॉन मिं जैबेर भलि खबर सुणा!
 ओ, यौ नगराँक मैंसो, तुम जोर-जोरल परचार करो!
 निडर हबेर यहूदाक नगरों मिं बताओ
 कि तुमर परमेश्वर उणिवाँल छन!
 द्यखो, प्रभु-परमेश्वर सार्मथक दगाड़ उणई,
 उं आपण ताकतल आपण राज करनी।
 उनर दगाड़ उं मैंस छन जनुकैं उनुल छुड़ै रॉखौ।
 उं ग्वावोंक चारि आपण भेड़ों कैं चरॉल।
 उं नॉन पाठों कैं आपण काखि मिं धरॉल,
 और ब्याई भेड़ों कैं माठू-माठ लिजाँल।

परमेश्वरक महानता

(यशाया ४१:१२-२४)

तुम यौ बताओ कि आपण आचुइल महासागर कैं कैल नाँपौ?
 और बेदल अगाश कैं कैल नाँपौ?
 कैल धरतिक मांट कैं भरौ?
 कैल पहाड़ों कैं तराँज मिं तोलौ?
 को प्रभु धैं के करणक लिजी कैं सकुं?
 उनुकैं राय दिणी को छु?
 उनुल बुद्धि कधैं मांगी?
 और उनुकैं न्यायक बाँट कैल दिखा?
 कैल उनुकैं शिक्षा दे?
 द्यखो, देश तो याँस छन जस बाल्टी मिं एक पाणिक बूंद।
 और उं तराँजोंक पालों मिं लागी बउवक कणोंक चारि छन।
 और द्यखो, परमेश्वर द्वीपों कैं धूलक चारि उठै लिनी।
 लबानोनक ठुलौ बोट लै उनर वेदी मिं जलूणक लिजी पुर न्है।
 जंडवक सब जानवर लै उनुकैं बलिदान चढूणक लिजी पुर न्हैतिन।

परमेश्वरक सामण धरतिक सब देश के न्हैतिन
 उनर दाम शून्य हबेर लै कम छु।
 हम परमेश्वरक दगाड़ और कैकी तुलना नि करि सकन,
 और उनर बखान करण हमर बश मिं न्है!
 उं क्वे मूरती न्हैतिन, जकै कारीगर बणूं,
 और सुनार उमिं सुन-चांदि लगूं।
 जो भगत सुन और चांदिक मूरती नि बणै सकन
 उ यस बोट कैं छांटों जमिं किड़ नि लागन,
 फिर भल मिस्तिर कैं बुलैबेर वीक मूरती बड़वों
 और उकैं इसिक ठाड़ करु जैल कि उ हिल नि सको।
 के तुम नि जाणना? के तुमुल नि सुणा?
 के तुमुकैं शुरुवाद मिं नि बताई गोया?
 जब बे धरति बणी, तब बे तुमुकैं समझाई जाणौ
 कि उं प्रभु छन, जो धरतिक मेलि मिं ठाड़ छन।
 हम सब धरतिक मैस पिटडोक चारि छूं,
 प्रभु अगाश कैं पर्दक चारि फैलै और तम्बूक चारि तांड दीं।
 परमेश्वर रॉज कैं भिखारि)
 और न्याय करणियों कैं बेकार ठैरै दिनी।
 जस्सै उनुकैं रोपि रॉखछी,
 उस्सै उनुल उनुकैं हाव-ब्यावल बूसक चारि उड़ै दे।

पवित्र-परमेश्वर पुछूं,
 कि तुम मेरि तुलना कैक दगाड़ करला?
 म्यर जस और को छु?
 अगाशक तरफ आँख उठैबेर द्यखो
 कि यौ तारों कैं कैल बणा?
 मी सुबदारक चारि उनुकैं हुकुम दिनु,
 और हरेक तार कैं वीक नाम लिबेर बुलूनु।
 मेरि सामर्थल उनुमिं बे एक लै नि छुटन।

परमेश्वर हमेरि हालत जाणनी

(यशाया ४१:२५-३१)

ओ इस्रायल, तु यस किलै कुंछै,
 कि मेरि हालत प्रभु नि जाणन,

और जो अन्याय म्यर दगाड़ हुणौ,
 प्रभु उमिं ध्यान लै नि दिणाय।
 के तुम नि जाणना? के तुमुल नि सुणा?
 सॉर दुनी कै बणूणी परमेश्वर न थकुं और न पस्त पडु,
 उं हमेशा बे हमेशाक लिजी प्रभु छन।
 उनेरि बुद्धि हमर समझ है भ्यार छु।
 उं थकियों कै ताकत
 और कमजोरों कै ताजगी दिनी।
 लौंड और जवान थाकिबेर पस्त है जानी,
 और पहलवान लै लड़-खड़ै जानी
 पर प्रभु मिं भरौस करणियों कै नई ताजगी मिलनै रौलि,
 उं गरूड़क चारि उचाई मिं उड़नै रौल।
 उ दौड़ॉल, पर नि थकॉल,
 उं हिटनै रौल, पर कमजोर नि पड़ॉल।

परमेश्वरक सेवक

(यशाया ४२:१-६)

यौ हिस्सों मिं यशायाह भविष्यबाणी करुं कि मुक्तिदाता कौंस हवाल।

तुमर परमेश्वर यस कूनी,
 "यौ म्यर सेवक छु, जकै मील छांति और समाव रॉखौ।
 यै देखि मी खुशि छूं।
 मील यकै आपणि आत्मा दी रॉखी,
 जैल यौ देशों मिं न्याय करल।
 और न धिम बत्ती कै निमॉल।
 और न उ डॉन-धारों मिं धात लगाल।
 उं कचमोरि नरकट कै नि टोड़ॉल,
 मील यकै आपणि आत्मा दी रॉखी,
 जब तलक कि सब मैस परमेश्वरक बॉट मिं नि हिटन,
 तब तलक परमेश्वर उं सबों कै सुधारनै रौल।
 उं आपण हिम्मत नि हॉरो,
 और दूर-दूरॉक देशोंक मैस लै इनार बातोंक बेसबरील इंतजार मिं
 रौल।

प्रभु-परमेश्वर, जनुल अगाश कैं बणैबर फैला, और धरति मिं रुणी सब
 चीजों कैं बणा, और मैसों कैं प्राण देई, उं यस कूनी,
 "मी प्रभु छूं, मील तुकैं धर्मक कामक लिजी बुलै रॉखौ।
 और त्यर हात थामिबेर तुकैं सहार दी रॉखौ।
 मील त्यर दगाड़ एक वैद करि रॉखौ
 जो और सब मैसोंक लिजी लै छु
 और मील तुकैं जातियोंक लिजी उज्याव लै ठैरै रॉखौ
 जैल तु काँणों कैं आँख दी सको,
 और कैदियों कैं छुड़ैबेर भ्यार उज्याव मिं लाओ।
 मी प्रभु छूं, यै म्यर नाम छु,
 मी तुमुकैं म्यर अलावा कैक अराधना नी करण द्यूं!
 देख, पुराणि बात पुर है गेई,
 आँब मी नई बात बतूनू, जो यैक बाद ह्वाल।"

परमेश्वर आपण मैसोंक हिफाजत करनी

(यशाया ४३:१-५)

हे याकूब, आँब तु नि डर,
 किलैकि तुकैं बणूणी प्रभु यस कूनी,
 "नि डर, मील तुकैं छुड़ै है
 मील त्यर नाम लिबेर तुकैं छुड़ै रॉखौ, तु म्यर छै।
 जब तु समुद्र पार करलै,
 तब मी त्यर दगाड़ रूल।
 जब तु गाँड़ोंक बीच बे जालै,
 तब उं तुकैं डुबै नि सको।
 अगर तु आँगक बॉट हिटलै, तुकैं के नि हो,
 वीक लपट लै तुकैं नि जलै सको।
 किलैकि मी तुमुकैं बचूणिवाँल प्रभु-परमेश्वर छूं।
 तु म्यर लिजी दुसार सब देशों हबेर भौत खाश छै,
 त्यर लिजी मील यौ सब छोड़ि हैलौ।
 मी तुकैं प्रेम करनू,
 म्यर नजर मिं तु भौत प्रिय और खाश छै!
 मी तुकैं छुड़ूणक लिजी अन्य जातियों कैं छोड़ि दिनू।

तु नि डर, किलैकि मी त्यर दगाड़ छूं।
 त्यार नॉनतिन सारि धरति मिं फैलै हैली,
 लेकिन मी उ सबों कै वापिस ल्यूल
 मी उनुकै चारों दिशाओं बे ल्यूल।
 यौ सब मेरि नामकि अराधना करॉल,
 किलैकि मील इनुकै यैके लिजी बणै रॉखौ।"

परमेश्वर द्याप्तों धैं पुछणौ

(यशाया ४२:८-१३)

उं मैसों कै म्यर सामण हांजिर करो,
 जनार आँख छन, पर उं नि देखन
 और जनार कान हबेर लै नि सुणन।
 होई, दुनियाक सब जातियोंक मैस जाँम हो!
 मिक्कै बताओ, उनुमिं यस को द्यप्त छु,
 जो हुणिवालि बातों कै बतै सको?
 और कैल बताछी, कि आँब यस ह्वल?
 अगर क्वे यस द्यप्त छु, उ यौ साबित करिबेर आपण बचाव
 करो!
 पर म्यर गवाह और सबूत तुमी छा।
 तुम म्यर ठैराई सेवक छा,
 यैक लिजी कि तुम मिक्कै जाणिबेर मि पर भरौस करि सको
 और समझि सको कि बस मी परमेश्वर छूं।
 म्यर अलावा न कभै क्वे ईश्वर छी और न कभै ह्वल।
 मी और बस मी प्रभु छूं,
 म्यर अलावा और क्वे दुसर मुक्तिदाता न्हैं।
 मील बता कि के ह्वल
 और मी तुमर मधत करणक लिजी आयूं।
 क्वे लै द्यप्तल कभै यस नि कर,
 और तु यैक गवाह छै।
 मी परमेश्वर छूं और उणिवाँल बखत मिं लै रूल,
 मिंबे कैकणी को बचै सको?
 और जो काम मी करण चानू,
 उ करण बे मिक्कै को रोक सकों?

मूरती बणूण बेकार छु

(यशाया ४४:९-१९)

जो मूरती बड़वूनै, उं सबा-सब बेकार छन,
 उनेरि यौ मूरतियोंल के भल हुणी न्है,
 जो मूरतियों कै आपण ईश्वर माननी,
 उं के नि देखन और न के जाणनी।
 उनेरि इज्जत नि हो।
 द्याप्तक मूरती कै खोदिबेर तुम किलै बड़वूँछा
 जबकि उ तुमर लिजी के नि करि सकन?
 यैल तुमुकै शरम लागेलि,
 किलैकि मिस्तिर तो मैसै हुनी।
 उं सबा-सब मिस्तिर म्यर सामण ठाँड़ होओ, मी उनुकै डरूँल।
 उं सबनक अनादर ह्वल।
 ल्वार लु कै भट्टी मिं खितबेर हथौड़ल पट-पटूँ,
 और फिर उकै आपण मजबूत हातोंल रूप दियो।
 यौ काम करन-करनै उकै भूक लागुं, उ कमजोर है जां,
 और जब उ पाणि नि पिन तब उ परचेत है जां।
 बढई लाकड़ कै लिबेर नापुं और फिर उमिं निशाण लगूँ,
 और यैक बाद रन्दल उकै बराबेर करिबेर उ मैसक रूपक बणै
 दीं,
 और उकै मानणिवाँल आपण घर भितेर धरनी।
 यैक लिजी मैस द्यारि या बांजक लाकड़ कै छांटुं,
 और उकै जंडव मिं ठुल हुडक लिजी छोड़ि दियो।
 इसिक उ बोट वां द्यो-पाणिल बढनै रुं।
 और ठुल हुण पर उ मैसोंक लिजी आँग तापणक
 और खॉण पकूणक लिजी काम उं।
 तब उ बकाय लाकड़ल द्युप्तकि मूरती बणूँ
 और धरति मिं चौड़ हबेर उकै पैलाग करुं!
 और तब इसिक उ चुल मिं शिकार पकैबेर खां,
 और आँग तापिबेर, अहा, आड मिं ताँत ऐ गे।

और बचीवाँल लाकड़ल उ आपण द्यप्तकि मूरती बणैबेर वीक पुज करुं,

और उधैं बिनती करिबेर कूं, "त्वी म्यर ईश्वर छै, मिक्कैं बचै ले!"
याँस मैस न के जाणनी और न के समझनी।

उनार आँख बन्द छन, उं के नि देखन, उनेरि मति मारी गे।
उं यौ थोड़ि सोचनी कि यैक आँद लाकड़ल हमुल खाँण पकैबेर खा,
और बचीवाँल लाकड़ल द्यप्तकि यौ मूरती बणै,
मी बौवाओंक चारि खालि यौ लाकड़क पुज करणयूं!
याँ मैस भल खाँणक बदाव छारूण खाणिवाँल जाँस छन,
उं भ्रम मिं पड़िबेर गलत बाँट मिं न्है गई।

उं न आपुं कै बचै सकनी,
और न यौ कै सकनी
कि हम झुट जॉल मिं फस रयूं।"

परमेश्वरक सेवकक सताव

(यशाया ५२:१३-५३:१२)

परमेश्वरक जरियल यशायाह यां फिर मुक्तिदाताक बारि मिं भविष्यबाणी करुं कि उं हमेरि कल्पना हबेर भौत फरक हवाल। उं एक खाश मैसक चारि नै पर एक भौत दीन मैस हवाल जनुकैं मैस नि अपणाल। उकैं भौतै दुख-मुशीबत सहण करण पड़ेलि। यौ यैक लिजी जरूड़ी छु किलैकि उनर सतावक जरियल हम बचि जूंल।

प्रभु कूनी,

"म्यर सेवक आपण काम भली कै करल

उ उंच्च करी जॉल और उ भौत महान हवल।

लेकिन मैस उकैं देखिबेर डर पडीं,

किलैकि वीक रूप बिगड़ गोछी।

यां तलक कि उ मैस जस लै नि देखीणौछी।

फिर लै उ भौत मैसों कै दंग करल,

वीक सामण रॉज चुप रौल।

किलैकि जो बात मैसों कै मालुम नि छी, यौ उनुकैं दिखाल,

जैक बारि मिं उनुल सुण लै नि राँखछी, यौ उ लै समझाल।

जो हमुकैं बताई गो, उमिं को भरौस करि सकूं?

ककैं मालुम छी कि प्रभुक योजना यस ह्वेलि?

प्रभुक सेवक एक नॉन बीक चारि सुकी धरति मिं जाँमौ
 उ क्वे रॉज या भल-बान नि छी कि हम वीक आतिर-खातिर करो।
 वीक क्वे खाश रूप नि छी,
 वीक तरफ चाणक मन लै नि करछी।
 कि हम झुट जॉल मिं फस रयूं।"
 हमुल वीक दगाड़ नफरत करी, और उकै कबूल नि कर
 उकै दुःख तकलीफ लै सहण करण पड़ी।
 सब मैस उकै देखिबेर आपण मूख पलटै लिछी
 हमुल उकै नि पछ्याण और तुच्छ समझौ।
 हमुल समझौ उकै घैल परमेश्वरल करि रॉखौ
 और उनुलै उकै सजा दी रॉखी।
 पर उ घैल हमरै पापोंक लिजी हई,
 और उनुल हमरै पापोंक बदाव मॉर खै।
 वीक दुःखल हम भल हयूं,
 और वीक तकलीफल हमुकै मुक्ति मिली।
 हम सबै बिन ग्वावक भड़ोंक चारि छी,
 हरेक मैस आपण-आपण बाँट मिं हिटणाछी।
 पर प्रभुल हम सबोंक पापोंक सजा उकणी दी दे।
 उकै सताई और मारी गो,
 तब लै वीक मूख बे आह! नि निकलि।
 जस भेड़क बच्च काँटणक लिजी लिजाँण बखत सुन्न रुं,
 और भेड़ आपण उण कतरणियोंक सामण चुप-चाप ठाँड़ रुं,
 उसिकै उ लै चुप और सुनसान रौ।
 मौतक हुकुम मिलणक बाद उं उकै मारणक लिजी लि गेई
 और क्वे लै मैसोंल यौ बातों मिं के ध्यान नि देय,
 कि उ हमार पापोंक बदाव मारी गो!
 उनुल खराब मैसोंक बीच मिं उनेरि कबर बणुणकि सोची,
 पर उकै एक अमीरक कबर मिं दफनाई गो।
 जबकि वील कभै क्वे कसूर नि कर,
 और न कभै झुटि लगै।
 लेकिन यौ प्रभुक मंशा छी कि उ मार खाओ,
 और पापियोंक लिजी आपण बलिदान दियो।

यैक लिजी वीक बंश भौत बढनै रौल और उ लम्बि उमर पाल,
 और वीक जरियल प्रभुक मंशा पुर ह्वेलि।
 आंखिर मिं, मी परमेश्वर आपण सेवकक बारि मिं यस कूनी,
 जो दुःख वील सहण करौ वीक फल देखिबेर उ खुशि ह्वल।
 उ भौत मैसोक पापक सजा सहबेर उनुकै बचाल,
 और वीक जरियल मैसों कै माफि मिलेलि।
 उकै ठुल पद मिलल और वीक इज्जत लै ह्वेलि।
 वील मौतक वेदी मिं आपण प्राण देई,
 और वीक गिन्ति बदमाशोक दगाड़ करी गे।
 उनुल मैसोक पापोक बोझ उठा,
 और पापियोंक लिजी बिनती लै करी।"

दुःखक बदाव खुशी

(यशाया ५४:१-१७)

यां यशाया मैसों कै तसली दिणौ कि उनर आजक खराब हालत सुधेरि जालि, किलैकि परमेश्वर उनुकै इदुक प्रेम करनी।

ओ तु जो बांझ छै,
 आँब तु खुशि हबेर जोर-जोरल गीत गा,
 और त्वील जो नॉनतिनों कै जनम नि दी राँख,
 यैक लिजी दुःखी नि हो!
 किलैकि आँब त्यार नॉनतिन दुसार स्यैणियों हबेर भौत जादे हवाल
 और छ्वेणी स्यैणिक घर-बार वालि स्यैणी हबेर लै जादे नॉनतिन
 हवाल।
 यैक लिजी आपण तम्बू कै बढा,
 यैक ज्यौड़ों कै लम्ब और वीक किलों कै मजबूत बणा,
 किलैकि आँब तु दैण-बाँ फैलेलि।
 त्यार बंशज देशों मिं अधिकार करिबेर वांक उजाड़ नगरों कै
 बसाल।
 नि डर, किलैकि आँब तेरि बेईजेती और तिरस्कार नि हो।
 जो बेईजेती त्वील जवानी मिं सहण करछी, तु उ भुल जालि।
 और आपण विधाव हुणक धब्ब लै तुकै याद नि रओ।

किलैकिक तुकै बणूणिवॉल त्पर बैग छु,
 वीक नाम छु सर्व शक्तिमान परमेश्वर।
 इस्रायलक पवित्र-परमेश्वर त्पर मुक्तिदाता छु,
 उं सॉर धरतिक परमेश्वर कहलाई जानी।
 प्रभुल तुकै इसिक बुलै रॉखौ
 जसिक क्वे छोड़ी स्यैणि कैं दुबार बुलाई जां।
 प्रभु कूनी, मील थ्वाड़ देरक लिजी तुकै छोड़ि देखी,
 लेकिन ऑब मी तुमिं दया करिबेर समाउंल।
 मील झिट घड़िक लिजी रीशक कारणल आपण मूख तुबे पलटै लेछी,
 पर ऑब मी हमेशाक लिजी तुकै प्रेम करुंल।
 मी तुकै छुडूणिवॉल प्रभु-परमेश्वरल यौ कूनी।
 यौ म्पर लिजी उस्सै छु, जस्सै नूहक बखत मिं छी,
 जस मील कसम खाछी कि मिं यैक बाद फिर कभै धरति कैं
 पाणिल डुबैबेर नाश नि करुंल,
 उसी कसम मी आज आजि खानू,
 कि मी आज बे त्पर दगाड़ कभै लै नराज हबेर तुकै नि डांटुल।
 चाहे पहाड़ आपण जांग बे टलि जाओ, या उं आपण जड़ों बे हिल जाओ,
 पर तुमिंबे मेरि दया नि हटो,
 और तेरि दगाड़ हमेशा मेरि शानति रौलि।
 तुमिं दया करणी प्रभु यौ कूनी।
 ओ यरुशलेम, तु दुःखी और निराश नगर छै
 और तुकै शानति दिणी क्वे न्हैं,
 देख, मी त्पार दुडों कैं छांटिबेर दुबार भल ढडल लगुंल,
 और तेरि नींव मिं नील-मणिक दुड लगुंल।
 मी त्पर मिनारों कैं मणियोंल और द्वारों कैं हिरांल,
 और दिवालों कैं कीमति रत्नोंल बणैबेर सजूंल।
 मी प्रभु खुद त्पर नॉनतिनों कैं सिखुंल
 और उं भौत शान्त-सम्पन्न ह्वाल।
 तु धर्मक बाँट मिं मजबूत हबेर ठाँड़ ह्वेलि
 और तुकै डर नि लागो।
 अत्याचार और डर त्पर नजीक नि आओ।

अगर तुमिं हम्मल ह्वलौ, उ म्यर तरफ बे नि हो
 और त्यार दुश्मण तुबे नि जिति सको।
 ल्वार जो लडैक लिजी हतियार बणूं, उकै मील बणा,
 और हतियार चलूणी सिपै कैं लै मीलै बणै राँखौ।
 पर त्यर खिलाफ क्वे लै हतियार काम नि करो,
 और तेरि खिलाफ जो लै गवाही अदालत मिं ह्वेलि,
 तु उकै कमजोर करि देली।
 यौ प्रभुक सेवकोंक बरदान छु।
 मी उनुकै जीत दिनु, प्रभु यस कूनी।

परमेश्वर हमुकै मुक्तिक लिजी न्युंत दिनी

(यशाया ५५:१-१३)

ओ सब पाणितिशा मैसो, पाणिक नजीक आओ!
 जैक पास डबल न्हैतिन, उं लै आओ!
 सब आओ और मोल लिबेर खाओ,
 बिन डबल्लोक अंगूरक रस और दूध पियो!
 जो खाँण न्है, उमिं डबल खर्च किलै करछा?
 और जैल शान्ति नि मिलनि, वीक लिजी मेहनत किलै करछा?
 मेरि बात मन लगैबेर सुणो,
 तब तुमुकै खाँणक लिजी भलि-भलि चीज मिलेलि,
 और तुम उकै खैबेर तिरप्त ह्वला।
 म्यर पास आओ और कान लगैबेर मेरि बात सुणो,
 जैल तुमुकै जिन्दगी मिलेलि।
 तब मी दाउदक दगाड़ करी वैदक अनुसार
 तुमुकै लै आशीश द्यूल,
 और यौ वैद तुमर दगाड़ हमेशा-हमेशाक लिजी ह्वल।
 जब तलक प्रभु मिलि सकुं,
 उनेर ढून-खोज करि लियो,
 और जब तलक उं नजीक छन,
 उनुकै अपणै लियो।
 खराब मैस आपण बाँट कैं छोड़ि दियो,
 और पापि मैस आपण गलत बिचारों कैं छोड़ि दियो

और प्रभुक तरफ आओ,
 जैल प्रभु उनुमिं आपण दया करो।
 उं हमर परमेश्वरक पास आओ,
 जैल प्रभु उनुकै माफ करौल।
 प्रभु यस कूनी कि म्यार बिचार तुमार बिचारों बे अलग छन,
 और मेरि और तुमेरि कामों मिं धरति-अगाशक फरक छु।
 धरति बे जदुक टाड़ अगाश छु,
 उदुकै टाड़ तुमार बिचारों बे म्यार बिचार लै छन।
 अगाश बे द्यो और ह्युक त्वाप टपकनी
 और उं लौटिबेर वापिस अगाश मिं नि जॉन,
 पर धरति कै सींचनी और अन्न उपजूनी,
 जैल जिमदार कै बीं और भूक कै खाँण मिलुं।
 इसिकै जो शब्द म्यर मूख बे निकलुं,
 उ म्यर पास खालि वापिस नि आओ
 पर जो मील कौ, उ जरूड पुर ह्वल।
 तुम आपण देश मिं खुशि-खुशील वापिस पुजला,
 और बाँटपन तुमुकै के परेशानी नि हो
 बाँट मिं पड़निवाँल डॉन और पहाड़ तुमर सामण गीत गाल,
 और मैदानों मिं बोट ताई बजौल।
 तब जां कॉनवाँल बोट छी, वां बगीच बणि जौल।
 और स्यूनक जाँग मिं मझेटि जामि जालि।
 यौ हमेशा-हमेशाक लिजी प्रभुक अद्भुत कामक यादगारिक लिजी ह्वल,
 और कभै नि टओ।

परमेश्वर आपण सब मानणिवॉलों कै अपणूनी

(यशाया ५६:१-८)

प्रभु यस कूनी,
 "न्याय कै मानो और भल काम करो,
 किलैकि मेरि मुक्तिक उण नजीक छु,
 और म्यर उद्धार जल्दी देखियल।
 धन्य छु उ मैस जो न्याय कै मानुं और धर्मक बाँट मिं हिटुं,
 ऐरामक दिन कै मानुं,

और हरेक किसमकि बुराइ बे आपुं कै बचै रॉखुं।
 जो विदेशी मैस प्रभु कै मानणी बणि गो,
 वील यौ नि सोचण चैन कि मी प्रभुक मैस न्हैतियूं।
 और क्वे मैसल लै यस नि कूण चैन
 कि मी तो सुकी बोट छूं, जैक क्वे औलाद न्है।
 किलैकि प्रभु यस कूनी,
 "जो बे औलाद मैस म्यर ऐरामक दिन कै मानुं
 और उं कामों कै करुं, जैल मी खुशि हुनू,
 जो म्यर नीमों कै पुर ढडल मानुं,
 मी उकै आपण घर और नगर भितेर यस नाम द्यूल
 जो औलाद वालों हबेर लै जादे लम्ब बखत तलक रौल,
 और यौ नाम कभै नि मिटो और हमेशा रौल।
 जो परदेशि मैस मिक्कै मानणी बणि गई,
 और जो मिक्कै प्रेम करनी, और मेरि सेवा करनी,
 ऐरामक दिन कै पवित्र समझबेर उकै माननी और उकै अशुद्ध नि करन,
 और म्यार सब नीमों कै पुर ढडल माननी,
 उनुकै मी आपण पवित्र डॉन मिं ल्यूल,
 और उनुकै आपण प्रार्थनाक घर मिं खूब आनंद द्यूल।
 और जब उं वेदी मिं आपण भेट चढ़ाल,
 तब मी उनेरि भेट कबूल करि ल्यूल।
 किलैकि म्यर घर सब जातियोंक लिजी प्रार्थनाक घर ह्वल।
 प्रभु जो इस्रायलक फैली मैसों कै जॉम करणी उं यस कूनी,
 इनर अलावा मी दुसार मैसों कै लै आपण पास लौटै ल्यूल।

परमेश्वरक सेवा कसिक करण चै

(यशाया ५८:१-१४)

म्यार मैसों कै भौत जोर-जोरल धात लगै-लगैबेर उनार पाप बता,
 और तु यैक बारि मिं चुप नि रौ।
 उं रोज मिक्कै ढुणनी और म्यर बताई बाँट मिं हिटणकि मंशा जतूनी,
 और यस दिखूनै कि जस उं भौत नीम धरम कै मानणी छन,
 और जसिक उनुल आपण परमेश्वरक नीमों कै नि छोड़ि रॉख,
 उं मिधै धर्मक नीमोंक बारि मिं पुछनी,

और म्यर नजीक उणक लिजी उं खुशि छन, यस लागणौ।

उं मिधैं कूनी, "हम बर्त करनू, पर तुम उ नि देखना,

हम आपण प्राण कै तकलीफ दिनू, पर तुम वीक क्वे ध्यान नि
दिना।"

परमेश्वर तुमुधैं यस कूनी, "जब तुम बर्त करछा,

तब तुमर मतलब आपण मंशाओं कै पुर करण हुं।

पर यैल तुमर बर्ताव मिं के फरक नि उण,

और फिर लै तुम आपण मजदूरों कै सत्यूँछा।

तुम बर्त करणक बाद लै दुसरोक दगाड़ लड़ै-झगड़ करछा

तुमर यौ बर्तल तुमेरि प्रार्थना स्वर्ग मिं नि सुणयो।

के मी यस बर्तल खुशि हुनू?

के बर्त धरणियों कै खालि-खालि आपण प्राणों कै तकलीफ दिण
चैछा?

के ख्वर कै वैलैबेर चौड़ करण,

ताव बे छारूण और टाट बिछैबेर बैठण बर्त हुँछा?

के तुम यकै बर्त समझछा?

मिकै यस बर्त बिल्कुल लै भल नि लागन!

बस मी यस बर्तल खुशि हुनू,

जैमिं तुम सबनक लिजी एक जस न्याय करो,

कैकै लिजी नक नि करो, अत्याचारल सताई मैसोंक मधत करो,

और मैसों कै गुलामी बे बचाओ।

और मी तब खुशि हूँल, जब तुम भूक मैसों कै खाँण द्यला,

गरीब-दुबाओं कै आपण भितेर जाँग द्यला,

नाँड मैसों कै लुकुड़ पैराला,

और आपण रिश्तेदारोंक मधत जरूड़ करला।

तब त्पर बचाव जल्दी ह्वल,

और त्पार घौ लै पुरि जॉल।

तेरि भलाइ तुकै बाँट दिखालि,

और प्रभुक महिमा तेरि हिफाजत करेलि।

मुशीबत मिं जब तु मिकै अवाज लगालै,

तब मी तेरि पुकार सुणुल।

अगर तु मैसों कै गुलाम बणूण,
 उनुकै नाम धरण और खराब बातों कै कूण छोड़ि दियो,
 अगर तु भूक मैसक लिजी आपण भकॉर खोल दियो,
 दुःखी मैस कै शानति दियो,
 तब त्यर उज्याव अन्यार मिं चमकल,
 और त्यर अन्यार दोफरिक चारि उज्याव मिं बदेई जॉल।
 तब प्रभु तुकै बाँट दिखूनै रौल,
 उं भड-भड देश मिं लै तुमेरि सब जरूवतों कै पुरि करॉल।
 उं त्यार हडिकों कै मजबूत बणाल,
 और तु उ बगीचक चारि हो लै, जैमिं कभै पाणिक कमी नि हुनि।
 त्यार नगरॉक पुरॉण खन्नोक मरमत दुबार करी जालि,
 जो बुनियाद भौत बखत बे छुटी छी, ऐल उं चिणी जालि।
 मैस तुमर आदर मिं कौल कि तुमुल यौ सब सुदारौ।
 अगर तु ऐरामक दिन कै अपवित्र नि करलै,
 और उ दिन आपण रोजक काम-धंध नि करलै,
 और उकै खुशीक त्यार मानलै, उकै प्रभुक आदरणीय दिन समझलै,
 आपण मनक मुताबिक उ दिन नि बितालै,
 तब तुम म्यर सेवा करणक लिजी खुशि ह्वला,
 और मी तुमर इज्जत पुर दुनी मिं करवूल।
 और जो देश दिणक वैद मील तुमर पितरोंक दगाड़ करि रॉखछी,
 आँब तुम उमिं शान्त-समपनन हबेर रौला।"
 किलैकि म्यर घर सब जातियोंक लिजी प्रार्थनाक घर ह्वल।
 यौ बात प्रभुक मूख बे निकलि रै।

परमेश्वर सब चीजों कै नई करॉल

(यशाया ६५:१७-२५)

"दुखो, मी नई स्वर्ग और नई धरति बणूणक लिजी जाणयूं,
 सब बिती बातों कै भुलै दी जॉल और उ मन मिं लै नि आओ।
 मी जो बणूणयूं, वीक लिजी खुशी मनाओ,
 हमेशा-हमेशाक लिजी खुशी होव!
 किलैकि मी यरुशलेम कै खुशी
 और वांक मैसों कै खुशीक जरिया बणूणयूं।

मी खुद यरुशलेम बारि मिं आनंदित

और आपण मैसोंक कारणल मी खुशि हूंल
और वां कभै क्वे डाड और शोक नि मनाल।

वां क्वे नॉनतिन नि हो,

जो थ्वाड़ दिनों ज्यून रैबेर जल्दी मरि जाओ,
और न यॉस बुढ़ ह्वाल

जो आपणि उमर पुर हुण हबेर पैलियै मरि जाओ।
हरेक मैस सौ साल तलक ज्यून रौल।

जो मैस यौ हबेर कम उमर मिं मरल,

उकैं दुसार मैस फिटकारवॉल समझाल।

यरुशलेमकि जनता आपण लिजी कुड़ बणैबेर उमिं रौल,

उं आपण लिजी अंगूरोंक बगीच लगाल और उनार फल लै खॉल।

ऑब यस नि हो कि उं आपण लिजी कुड़ बणाओ

और उनार दुश्मण उमिं रओ

उं अंगूरोंक बगीच बणाओ,

पर वीक फल उनार दुश्मण खाओ।

म्यार मैसोंक उमर बोटोंक चारि भौत जादे ह्वेलि

म्यार ठैराई मैस भौत लम्ब बखत तलक आपण मेहनतक फल
खॉल।

उनेरि मेहनत फालतू नि जाओ,

उनेरि औलाद दुःखक दिन नि देखाल,

किलैकि उनुकैं मी प्रभुल आशीश दी रॉखी

और उनार नॉनतिनों कैं लै।

उनर धात लगूण हबेर पैलियै मी उनुकैं जबाब द्यूंल,

उनेरि दुआ खतम लै नि है रौलि कि मी उकैं सुण ल्यूंल।

भेड़िया और भेड़-बकॉर एक दगाड़ चरॉल,

शेर बल्दक चारि बूश खॉल और स्याप कैं देखिबेर क्वे नि डरो

उं म्यर पवित्र डॉन मिं कैकणी के नुकसान नि करो।

यै प्रभुक अवाज छु।"

परमेश्वर कै मंदिर नि चैन

(यशाया ६६:१-२)

प्रभु यस कूनी,
 "अगाश मेरि गद्दी और धरति मेरि खुटोंकि चौकि छु,
 तब तुम म्यर लिजी कस घर बणाला?
 उ जाँग कां छु, जां मी ऐराम करि सकनू?
 यौ सबों कै मीलै आपण हातल बणै राँखौ,
 और यौ सब चीजोंक मालिक मी छूं।
 मी उ मैस मिं आपण ध्यान द्यूल
 जो दीन और पश्चातापी छु,
 और मेरि बातों मिं भरौस धरुं।"